

安徽古籍叢書

龍眠風雅全編

〔清〕潘江輯 彭君華主編

八

黃山書社

龍眠風雅全編

八

〔清〕潘 江輯 彭君華主編

第八冊目次

龍眠風雅續集

卷九

孫中礎(二百二十二首)……………三四三一

卷十

張茂稷(一百一十七首)……………三四九一

節婦孫氏(一首)……………三五二三

卷十一

何永紹(四十九首)……………三五二五

蔣蕙(六首)……………三五四〇

卷十二

左國棟(五十八首)……………三五四三

左之輓(十一首)……………三五五九

左史(四首)……………三五六三

周孔忠(六首)……………三五六四

戴耆英(二十四首)……………三五六七

張思耀(十二首)……………三五七四

齊烜(二首)……………三五七八

左文詔(二首)……………三五七八

左文詩(二首)……………三五七九

楊芳(二首)……………三五八〇

范韓(二首)……………三五八一

趙曾(一首)……………三五八二

戴璫(十五首)……………三五八三

鄧 芝(二十七首) 三五八八

孫伯麟(一首) 三五九六

卷十三

王天壁(一百一十五首) 三五九七

方逢月(一首) 三六三一

劉 蕃(十八首) 三六三二

劉 漢(二十二首) 三六三九

何亮功(七首) 三六四五

吳接雲(四首) 三六五〇

李明楫(十二首) 三六五二

何永炎(七首) 三六五六

方尊堯(二十六首) 三六五八

卷十四

徐 翥(八十四首) 三六六七

陳 昉(三十一首) 三六八八

方 遷(一首) 三六九九

吳彥聰(十六首) 三七〇四

吳彥瑋(六首) 三七一〇

方正言(二首) 三七一二

李 越(九首) 三七一三

杜 陵(六首) 三七一六

楊臣鄰(三十首) 三七一八

楊嘉謨(二十一首) 三七二五

卷十五

李 雅(一百五十四首) 三七三三

卷十六

姚士堅(一百六十二首) 三七九三

姚士塾(十七首) 三八三八

何 瀆(十首) 三八四三

齊 亮(十一首) 三八四七

程 烈(四十八首) 三八五〇

卷十七

陳式(八十一首)……………三八六七

方中通(九十首)……………三八九四

陳氏舜英(十首)……………三九二〇

卷十八

趙襄國(一百零八首)……………三九二五

龍眠風雅續集卷九

木厓潘 江蜀藻輯

孫中礎

字肖武，又字發一。武公先生之長君也。甫十歲，與閩中之難，流離歸里，一遵母方夫人教。性穎慧，凡書史一經瀏覽，輒成誦不忘。及長，雅善操觚，詩文不蹈恆畦，同社諸子咸以牛耳相推。又工行、草、篆、隸，于古法書無不摹寫神似，舅父無大師以能書歸之。爲人豪邁倜儻有父風，力挽強弓，善騎射，尤豪于酒，慷慨悲歌，旁若無人。其才氣橫騖如此。善讀書，露鈔雪纂，寒暑無間，手錄經史古文幾等身。以屢踏省門不收，去游太學，京師諸公卿爭折節與交，宗伯李醒齋先生尤崇重之。與趙鐵源輩俱用博學宏詞薦，以親老力辭不就。宗伯公歎曰：「此真高人名士，不可及也！」歸里即嬰疾，年纔四十五卒。所著有書澤堂集、蜨園詩草、江海吟諸稿。又彙古事爲三卷，名盤孟集行世。三子：曰書、元衡、曰注，皆能世其學。

對酒歌

四首

金紫非不羨，貧賤轉相宜。有刺胡敢投？門前立熊貔。叱人使遠走，見人頻指麾。僥倖登其堂，喜怒不可知。男兒自有骨，委蛇將安爲？交盡天下貴，依然寒與饑。我有足可裹，我有帷可披。

有面不見人，見人顏色無。非是無顏色，金盡相與枯。里閭多豪門，門多弄文儒。旦暮走其庭，筐篚取歡呼。恐逢主人怒，先媚桀黠奴。一言拂其欲，不許立須臾。咤叱不敢前，欲走不敢趨。努力采薇蕨，干人遭窮途。

開口輒不合，殺我一世人。不慣逢時語，非意即相嗔。使酒還罵坐，遑問有大賓。有時亦默默，人言不相親。一杯常在手，傲骨殊嶙峋。澤中清且淺，羊裘理釣緝。貪此諫議貴，安能老富春？士前爲慕勢，抱璞且歸真。

昔時陶穴處，今日錦棚居。昔時擔石夫，今日出駕車。人生可未量，滄海供春鋤。青白猶有目，富貴念慮疏。平心與世物，率意何容與？不勞巧會計，終歲苦趨趨。夏雲復秋雨，

夜月來窗虛。

遠別離

十六爲郎婦，頭白終相守。始念原如斯，離別常八九。策馬舊年遊，河梁把郎手。屬郎定歸盟，郎言會秋後。秋來卜行人，卜者說相負。前路有人羈，鄉心爲彼誘。妾心怪卜非，猶釀洗塵酒。青青樹葉黃，俾妾坐虛牖。鴉啼來遠人，啼之竟無取。荏苒春又深，飛燕求其偶。雙雙宛頸宿，在我梁之右。日出同出餐，不銜它鳥糞。未幾乳燕生，母子聲喁喁。見我薄命人，爲我生憐否？皓月常盈盈，照我庭前柳。對之意何如？自恨還自咎。有琴不能彈，有酒難向口。嗟郎在何方？長年江天走。清尊夜半歡，豈念妾箕帚？紈綺多傾城，豈念妾容朽？昨夜夢郎來，握郎之左肘。說盡別離情，淚下盈數斗。恨殺鷄催曙，心曲談未久。富貴非所願，願得守井臼。妾言直如此，郎心隱難剖。錯嫁輕薄郎，輕薄少聚首。

偶成

秋風兩高樹，冷雨何淒淒。幽情夢不成，雙雙烏夜啼。斷卻門前樹，莫使夜烏棲。

送方位白之長安

天既生有我，安能老故丘？古來輕離別，十年作沈浮。上堂拜父母，妻子不敢留。黃金歸馬勒，白雪耀崩綬。負劍出門去，豈爲孟浪遊？笑拂珊瑚鞭，駒走直如流。生長亂離間，不識風塵愁。聞說長安道，衣服裝貔貅。凜凜入都門，車前無八騶。相逢舊賓客，泣下澣羊裘。願君括其囊，刺莫投王侯。願君結其舌，話莫盡綢繆。歸來春雨足，同飯隴上牛。赤文綠字書，藜火坐高樓。殷勤治杯酒，和歌彈箜篌。甚勿久留連，顧影嗟無儔。

壽和州戴無忝

父母自我生，劬勞盡拊鞠。稍長知姓名，坐我于誦讀。過庭訓以禮，交遊戒翻覆。貴在賢子孫，豈量升斗祿？歷陽有戴子，生長在名族。少小適四方，經歲事馳逐。家破十年前，滄海易陵谷。不願爲雉飛，立志爲龍伏。龍伏清冷淵，有時戲濁漉。雉飛出天表，終當葬人腹。良玉不自鳴，抱璞藏深匱。何爲泣三刖，輕賤同硃碌？君從度江來，布衣相攀掬。生平不見面，一見成骨肉。同病是孤兒，淚下未敢哭。茅容有蔬草，林宗以止宿。行李何所有？五車盡簡牘。落筆如奔雷，著書輒連屋。豪氣重岱華，論說無邊幅。慷慨對青熒，

搔首悲頭禿。惟愛燕市屠，酒酣歌擊筑。教我追古人，當效皮與陸。無忝與予書，「比來無事，當效皮、陸之緒」云。得從叔度遊，自顧何鹿鹿？咕嚕坐青氈，刻鵠終類鶩。鬱鬱久居此，光陰不可復。忽漫二十年，堙沒在林麓。君今三十辰，聲名四海矗。不娶亦不官，獨留青白日。膝席爲君壽，浮白盈一斛。生逢亂離時，相看視且熟。莫作司馬賦，棲棲無處鬻。願得似杜陵，畏人成小築。

送田伯之黎川

丈夫各有志，安能守鄉里？鄉里多豪門，結綬垂青紫。丈夫苦饑寒，淒涼啼稚子。堂上有老母，垂暮織紉綺。甘毳不可得，家貧歡菽水。掉頭出門去，馳驅非騶駟。一琴一卷書，蒯緱壯行李。秋風蕭瑟多，辛勤何足恥？在家且饑寒，況當出門矣。西江古名勝，遙望白雲起。老父居其下，衣緇着敝屣。一見當再拜，淚下胡能已？豈敢怨風塵？別離疏甘旨。有言向膝前，絕不問桑梓。廩山高千尋，可望不可擬。嗟我蓬蒿人，何堪久居此！

舟中望青原山不及訪舅父無大師爲此志懷

四首

青青石上松，皎皎雲中鶴。鶴不入塵網，松不嗟搖落。達人能見幾，一丘同一壑。裁衣有

芰荷，充餐有藜藿。更有笠與瓢，飄然隨行脚。千秋一片心，篝燈還著作。

憶昔澤園日，羣賢畢集時。詩風歸大雅，努力下重帷。天地倏瓦裂，奔散如雲馳。吾父命已授，吾舅衣已緇。高節同千古，各各見心期。可憐一抔土，寂寞空傷悲。

猶記合明山，草團坐茆舍。風雨談往事，燈昏談未罷。有時笑相看，有時淚如瀉。拂袖忽然行，住錫廩山下。閉關著炮莊，筆研不肯暇。不知古與今，悠悠曉與夜。

遙聞碧雲語，移住青原巔。青原古道場，荆樹傳千年。香城山與峙，文筆峯與聯。登高頻弔古，鷓鴣啼蒼煙。欲拜法幢下，曉風催發船。乞食無定踪，會面良有緣。月骨久相別，搔首涕潸然。青原猶在望，有涕徒潸然。

鬱孤臺

贛山何其壯！贛水何其清！山水相環抱，忽開古郡城。西南一遙望，高臺殊嶢嶢。鬱然而孤立，勢與崆峒京。贛有崆峒山。偶來登臺上，晚風次第生。家家接煙火，樹樹挽餘晴。牛放屋後岡，疑從屋上行。千帆夕陽裏，遠笛忽有聲。一羣歸鳥下，一段歸雲明。故山不可

見，感此淚縱橫。本爲負米遊，離別多苦情。孀帷坐老母，屈指數征程。

八境臺

子瞻徧遊覽，往往多苦吟。高臺既已敗，遺踪傳至今。後人憐才意，前人好名心。輪奐忽重葺，雨雪毋相侵。七閩與五嶺，遙指山層陰。嗟予性浩蕩，每喜登高岑。俛仰風塵間，懷古情何深。搔首欲放歌，愁殺鷓鴣音。

過梅嶺

四首

橫浦艤孤舟，忽報水程止。我從豫章來，曉夕親舟子。安之若爲家，離舟翻不喜。南安多崇山，梅嶺插天起。青影望無窮，飛雲如流水。籃輿次第過，未過心憂只。昔聞梅嶺名，今幸來過此。嶺路殊盤旋，石磴隨宛委。前人相喚聲，已在翠微裏。

看山畏山險，來登勢頗平。陽坡燒盡黑，僧種茶爲生。施茶當嶺半，往來坐茶棚。行者捐一錢，頃刻錢盈鐙。山泉號卓錫，勺之寒復清。右有放鉢石，一叩聲錚錚。憩息梅關內，回見南安城。征夫當赤日，道上如蟻行。紛紛何所役？牽人惟利名。

榕樹何森森，露根蟠曲徑。陰覆古靈祠，冷然發清磬。閉戶有老僧，梵音山谷應。輿人未肯行，耽涼坐石磴。殷殷聽雷鳴，雲黑山將暝。山高常近天，陰晴原無定。鷓鴣聲轉急，客心不可聽。非爲乞食來，那能乘遠興？到此且探奇，無容傷蹭蹬。

九齡開鑿巧，梅福曾隱居。但見丞相祠，不聞隱者廬。昔號梅花國，一株無復餘。那得寄我友，使我徒歔歔。嶺路漸已坦，行人勿徐徐。下嶺有茅店，沽酒還烹魚。居然開阡陌，婦子荷耕鋤。晚風散禾黍，習習涼衣裾。地弗近城郭，古道未全除。

寄家書 二首

有弟常多病，寄來前月書。書中懷我句，讀之增歔歔。追呼頻在戶，酬應苦躊躇。遠人雖不見，念此何嘗疏？又聞生得男，舉杯欣有餘。停雲含落日，孤影坐窗虛。豈不思故園，況有親倚閭？

自爲予家婦，年年送行李。與君握別時，凍雪欲墮指。忽見楊柳色，又看秋風起。渺渺天外山，汨汨長江水。寸心如夢絲，繫戀無時已。不必怨別離，良爲貧所使。救貧倘無策，別離從茲始。

孤兒行

贈倪樾公

噫歔歔！君遺腹，我孤子。眼前常笑無知己，所以至今不曾死。知己不問黃金有與無，但期然諾無違耳。與子四載同學書，學書不成去學劍，學劍又爲世所恥。有時痛哭霜葉紅，有時繫筑和歌于中市。相對慷慨復悲呼，須臾怒目髮上指。他人罵我等狂生，他人富貴何足當狂生側目之一視？屈指長我方二年，顛毛種種胡如此？嗚呼！今日之人不可交，今日之事無挂齒，飲酒食肉而已矣。

窮途行

嘗笑蘆中伍子胥，乞食漁翁何卑歟！又笑袴下淮陰侯，不能刺人肯低頭。嗟乎！若使無蘆中與袴下，王孫之名安在哉！并不信子胥有報仇之才，所以丈夫不以窮途苦，詩書可讀力可努。哀哀不辰獨我生，行年十歲亡其父。架上短布不成袍，牀上脫粟無二鬴。妻病于室愁欲死，弱女支離悲相視。我行見此怒且恨，拂衣浩歌歌變徵。感慨胸中不能除，鄰翁相愛酒招吾。酒酣耳熱悲將至，更使坐上知音者唱鷓鴣。鏤鈇有寶劍，赤文有鉛槧。焚鉛槧，束寶劍，大笑出門何所念？生既昂藏合有意，豈能老死於此無所事！

光漢白招飲感賦

君擊筴，我高歌，歌罷痛哭奈君何？金風蕭蕭送秋去，銜杯醉眼撫庭柯。幾載流離悲生死，篋中寶劍晝夜磨。吁嗟乎！相知貴知心，近日聞說重黃金。我輩同仇言交態，當使百世而下述之羨且欽，豈在乎杯酒酬唱之如今！兩兩顧影布衣身，堂前鶴髮俱孀親。亂世飄零不可知，安得武陵之叟不爲嬴氏民？且盡此夕君之酒，痛飲狂歌莫厭頻。仰天大笑去不得，閉門甘作蓬蒿人。

夜集方田伯位白素北書室同戴無忝讀先君大略齋詩集感賦

我父少小好孫吳，行事不屑爲時趨。三歲積石羣兒戲，聲言步者八陣圖。及長下帷龍眠巔，著書一時稱絕無。終朝射雀在平莽，長年走馬出江湖。座上不下三千客，最愛燕市之狗屠，卑卑巾幗非丈夫。吁嗟乎！男兒有志報□君恩（一），異代而下悲忠魂。吾父死以成其志，正氣磅礴留乾坤。然指夜半殊凜烈，至今親舊猶能言。奉其遺集餉我友，讀之一室寒轉溫。同作歌行且當哭，蕉窗夜雨聲潺湲。方子詩情如秋水，秉筆又有奇才之戴子。戴子鐵骨不可磨，獨立高風無徙倚。大雅力振蔓草衰，出言千古供鞭箠。愧我庸才不能賦，

識此悲歌之今夕而已矣。

戴韓五二十初度

記得總角與君友，追隨城北常攜手。君家堂上有孀親，堂上我亦悲孀母。夜半有聲皆嗚咽，淚下如血空搔首。我心知子子知吾，繩交方之嬰與夫。腰下有鐵不拜人，人之見者咤狂奴。狂奴焉敢不下拜？高梧之鳥不爲藜藿之趨。屈指長君已二齒，桔槔俯仰隨鄉里。書上太尉魏坡公，奉章難與田疇比。子長二十遊禹穴，聞道今朝君是矣。春秋自此亦何長？敢引座上之滿觴。贈君一言君莫忘。君莫忘，日月最忌人年少，舉目堂上之髮已飛霜。吁嗟乎！知君已抱不世之奇才。前驅坐看先驚駘，區區貧賤莫徘徊。王侯將相寧有種？燕雀安知鴻鵠之志哉！

夢倪樾公

時樾公客山東

夜深跌坐思杳然，大風欲拔茅屋椽。獨飲無賴方隱几，此時夢繞故人前。故人告我奔走苦，囊頭留看無一錢。嗚呼！男兒有志在四方。古來俠烈輩，幾人老死妻子傍？櫪下有寶馬，奇書裝縹囊。慷慨拂衣不回顧，一去十年忘故鄉。恨殺庭前樹杪聲，不管吹破夢中

人。人生大塊悉如此，富貴功名夢裏身。此時此夜難再寐，鷄聲三唱月過鄰。

酬方田伯感舊之作

物不得其平則鳴，大嘯一聲天地驚。慷慨長歌澤園之舊遊，先君同舅氏無大師及周土室公、方明農公、吳虛來公，有「澤園五子」之盟。一讀再讀淚橫流。滄田桑海心百鍊，死生而後交情見。所以古人重託交，不在其常在其變。棄家如屣隱瓢笠，凜然古道照顏色。見我執手哭我翁，猶喜我翁能死國。墓門高築臥熊熊，曉夕但有荆棘風。澤國堂上聚五英，講習應是此日之精忠。爲其後人不可忘，連理兄弟何昂藏！落筆直使鬼神泣，羨哉！堅臥不起者有季方。吁嗟乎！君無車，我戴笠，流離歸來家壁立。喜君衣彩雙親壽，悼我遺書徒滿笈。不能學王哀攀柏之呼號，不能學李翬斷志之逋逃。塵土十年市井中，高飛努力無羽毛。且掩柴門坐春夏，左圖右史觀奇者。頽然醉臥北窗風，不願鳩人之高車與駟馬。

飲懷西樓醉歌

有友懷西名其樓，樓前老樹枝相樛。主人忘機鳥雀喜，挾子來巢高樹頭。四時鳥雀聲不斷，居然城市柴門幽。招我列坐懷西上，清風收拾滿園秋。生平性癖常在酒，乘興一飲酒